

'Sëédhe 'ö Pɔlö -ya bɔ

-Zlan -bha me -nu

-dho 'kuë- -sü 'ö

Efezö

plöö -a -dhë bhë 'ö =ne

-Wekadhe

**1** <sup>1</sup>Ma Pɔlö 'ö -Zlan -dhi -a -dhë -wun 'ka, 'a Yesu Klito -bha bɔme 'ka, 'ö 'sëédhe =ne 'a- bɔ -Zlan -bha me -nu 'ka Efezö 'ka -to =wou' -sü 'ka, -klu Klito -bha -sü 'gü ka -dhë. <sup>2</sup>'Ka -büee! -Zlan 'ö kwa Dë 'ka waa- kwa Dëme Yesu Klito -wo 'glusë kë ka 'ka, -wo =zuöyagluu nu ka -dhë.

**-Zlan -bha 'dhuë- 'ö bɔa Yesu Klito -ta 'ö- kpɔ kwa -bha.**

<sup>3</sup>-Kwa kwa Dëme Yesu Klito Dë -Zlan 'tɔ -blü! -Ya 'dhuë- 'kpɔ kwa -bha kwa -bha -klu Klito -bha -sü 'gü; yö =ga 'ö 'dhuë- =suu'- 'saadhö kpɔ kwa -bha -Zuu 'slööslö 'gü =zian' -dhe -nu 'wo dhang- -nu 'gü -an -bha bhë.

<sup>4</sup>Bhii 'ö tɔɔ -Zlan -yö kwa -sü 'dhiö -yaan =tun 'kpongtaadhe kë -na; 'ö kwa -ya kö 'kwaan- kë Klito -bha me -nu 'ka, -yö kë 'dhö 'kwaan- kë me -nu 'wo 'slööslö 'ö 'wun =zaa' -sü gbe 'yaa -an -bha -an 'ka -a wö 'dhiö. <sup>5</sup>Bhii kwa -dho 'ö -Zlan -kë bhë -a -wun 'gü, 'yö kwa sü 'dhiö =zian' kö 'kwaan- kë -a -bha 'në -nu 'ka =bɔa' Yesu Klito -ta -sü 'ka; -yö -we -a -bha kö -yö kë 'dhö 'ö tɔɔ -yö -kë -a -dhë -së. <sup>6</sup>-Yö kë 'dhö kö -Zlan 'tɔ -yaan bho 'glusë =va 'ö- -kë kwa 'ka 'ö bɔa ö Gbö -dhökësüzë -ta bhë -a -wun 'gü.

<sup>7</sup>Bhii Klito fei 'ö -lo -a -bha ga -sü 'ka bhë =ne 'ö kwa bhoë 'gan 'gü 'ö -Zlan -yö -ziö kwa -bha =sɔɔn yaa -nu -ta. -Kɔ bhë =ne 'ö -Zlan -yö 'glusë =va bhë -a =zuan', <sup>8</sup>'ö 'wun -bho 'koukédhe waa- 'kpaakpadhe =suu'- 'saadhö

-an nu kwa -dhë -va 'ka. <sup>9</sup>Bhii -a -bha 'slë 'ö -kë -bin -sü 'ka 'yö -we -a -bha 'dhiö kö 'yaan- -a 'gü -pë kë -bɔa' Klito -ta -sü 'ka bhë, -ya -zɔn kwa -dhë. <sup>10</sup>Slë 'ö 'dhö bhë 'ö tɔɔ -Zlan -dho pë -nu 'wo dhang- -nu 'gü waa- -an me -nu 'wo 'kpongtaa -an 'plë kpa 'kuë- kö -yaan -an -kɔɔnme kë do Klito 'ka. 'Slë 'ö bhë -ya -kë 'dhö kö -a yi -ya -lo -yaan -a 'dhiö -mɔ 'kuë.

<sup>11</sup>Me -nu 'ö 'kwa -Zlan -wo -dhe 'wun gia- -me 'ka Zuifö -nu ziën bhë, kwa -bha -kpa Klito -bha -sü 'ka, pë -sɛɛbɔ -nu 'wo -ya -sü 'ka kwa -gɔ bhë 'kwa kwa -bha yö. Bhii -Zlan -yö kwa -sü 'dhiö yö gia- ö -bha 'slë -nu kë -kɔ 'ka; -Zlan -de bhë, -yö ö -bha 'wun -nu 'plë -kë -nɛ -kɔ 'ö- -yaa' ö -zuö' 'piö bhë -a 'dhö. <sup>12</sup>-Dhe 'ö 'pö, me -nu 'ö 'kwa Klito -wun -dhe 'wun gia- -me -blëzë 'ka bhë kwa -bha -tosiadhe kë -sü -yö kë -Zlan 'tɔ -bliü -gen 'ka!

<sup>13</sup>Bhii me 'kaa Zuifö 'ka, ka -de 'pö, -dhe 'ka ka 'to 'to 'wun 'ö -gban 'wun gia- 'ö 'wuntɔsë 'ö nu dha -sü 'ka ka -dhia -nɛ -a -bha, 'ka- ma, ka- dhe 'wun gia- Klito 'gü. -Dhe 'ö 'pö -kaa dɔa -nɛ -Zlan -ya -duakëpë -ya ka -bha -a 'tɔ 'gü -Zuu 'slöösLö 'ö- 'tɔ go ka -dhë bhë -a -nu ka -dhë -sü 'ka. <sup>14</sup>-Zuu 'slöösLö 'ö bhë -nɛ 'ö tɔɔ pë 'ö -Zlan -ya -ya kwa kwɛɛ -a -zɔn -sü 'ka -nɛ pë 'ö- 'tɔ go kwa -dhë bhë -yö -dho -a -de kë. -Ya -pö -yö -dho kë -to kwa -gɔ -pë 'ö dho to kwa -gɔ yi 'ö kwa -bha -ya -de 'flëë 'gü -sü dho yöë 'ko 'dhiö -a 'ka. -Dhe 'ö 'pö -kwa -Zlan -bha -kë -va -sü 'tɔ -bliü!

### Pɔlö -bha -bhea' -sü

<sup>15</sup>Pë 'ö -kë 'ö -dhe 'ö ka -bha -zo yö -sü 'ö Dëme Yesu 'gü waa- ka -bha -a -dho -kë -Zlan -bha me -nu 'saadhö 'ka -sü bhë 'ma- ma, <sup>16</sup>n -zo -yö -büö ka -wun 'ka -kplawo ma -bhea' -sü 'gü, 'ö -ya kë 'dhö, 'maa n bo -Zlan zuö pö -dhia ka -wun 'gü 'ö bhë. <sup>17</sup>-Yö kë 'dhö kö kwa Dëme Yesu Klito -bha -Zlan 'ö kwa Dë 'tɔ bhɔ -sü -zë 'ka bhë -yö ka gbaa 'wundɔdhe 'ka 'go mü -yaan ö -de -zɔn ka -dhë 'kaan- -a dɔ 'kpakpadhö. <sup>18</sup>'Go mü kö -yö ka -zuö' 'yan 'dhi 'po, kö 'ka pë -nu 'wo- -bha -dhɔɔ kë -wo 'piö -pë -nu waa- pë -nu 'tɔ bhɔ -sü -zë 'ö- -gɔ pë -nu 'ka 'ö- -ya ö -bha me -nu -bha 'ka bhë 'kaan- -an dɔ, <sup>19</sup>kö 'piigbeedhe 'ö nu -sü 'ka me -nu 'wo- -wun -dhe 'wun gia- -me -nu 'ka -an -dhë kö -a -bha -kë 'gbliüünzë -kɔ bhë 'kaan- -dɔ 'pö. 'Piigbeedhe gia- 'ö bhë 'ö -Zlan -ya sü 'ö ö -bha 'wun -nu -kaa' 'gügbeedhe 'ka. <sup>20</sup>Bhii yö -nɛ 'ö Klito bhoë ga 'gü 'ö- süë, 'ö- -yaa' ö -bha -yadhe -bhlëzë -bha -dhe 'ö dhang- 'gü -a -bha. <sup>21</sup>-Dhe 'ö bhë -a 'gü, Klito -yö -ya -sü 'ka -wogbiindhe 'saadhö, -kɔ -mɔ 'wun -bha -sü 'saadhö, 'piigbeedhe -suu' -'saadhö 'wo 'kpongtaa waa- -an me -nu 'wo dhang- -nu 'gü, -ya me -gɔ -taa -sü 'saadhö waa- 'tɔ 'saadhö 'ö 'yaa 'tɔ me -nu 'wo -dɛɛ -nɛ -a 'gü -an -de 'sloo 'ka 'kɛɛ 'tɔ me -nu 'wo dho kë -dhö 'dhiö -zian' -an 'plë -yö -ya -an -gɔ -taa. <sup>22</sup>-Zlan -yö pë -nu 'saadhö -an 'plë -lo Klito -gen -löö; 'go mü -yaa- -ya -a -wun -dhe 'wun gia- -me -nu -to 'dhö -sü -kɔɔnme -va 'ka. <sup>23</sup>-An -to 'dhö -sü bhë -nɛ 'ö tɔɔ Klito bun; -dhe bhë -nɛ 'ö Klito 'ö -dhe -suu' -'saadhö -a 'gü bhë 'ö -ya -sü 'ka -a -bha ö 'plë 'ka.

**-Bo ga 'gü -sü 'ö -kë -a 'gü -sü -yö -kë me -gɔ**

**2** <sup>1</sup>Dhiö -be, -Zlan wö 'dhiö -zian', ka -kë ga -sü 'ka ka -bha 'wun =zaa' -sü waa- ka -bha =sɔɔn yaa -nu -wun 'gü; <sup>2</sup>'ö 'ka 'ta sü -tosiadhe kë -ko yaa 'ö 'kpongtaa zö -a kë -ko 'ka; 'ka =bhlëyadhe nu -zuu yaa =suu' -'kpekpe 'ö 'wo 'dhung- -ta -an =kɔɔnmɛ -dhë. Dɔ 'ö 'kwa- wo =dɛɛ =nɛ -a 'gü bhë, yö =nɛ 'ö yuö kë -na mɛ 'bhee- -nu 'waa -Zlan =bhlë -ya -an 'gü bhë. <sup>3</sup>Kwa 'saadhö kwa -kë =nɛ -an 'dhö 'dhiö -bezë; kwa -kë -tosiadhe 'ö -kë kwa -bha mɛbheedhe -bha -de =dhɔɔbhaapë -nu 'ka -an kë =dhia; 'ö pë yaa =suu' -'saadhö 'ö kwa bun waa- kwa -zo -ta -a 'gü -wun -an -dhë -së, 'kwa -kë -an kë =dhia. Pë 'ö 'kwa =kaa' bhë -a -wun 'gü 'kwa -ya kö -Zlan -bha -naadhe -yö nu kwa -ta =nɛ mɛ -nu 'wo to -an 'dhö.

<sup>4</sup>Kɛɛ -Zlan -bha kwa 'yena yö -sü =yö =va 'sönggö -sönggö. -Dhɔ 'ö- -kë kwa 'ka bhë -a -wun 'gü, <sup>5</sup>mɛ 'ö kwa -kë ga -sü 'ka -a wö 'dhiö =zian' -be kwa -bha 'wun =zaa' -sü -wun 'gü bhë, -yö -ko 'zü 'ö -kë -a 'gü -sü nu kwaa- Klito -nu kwa -dhë. Bhii -Zlan -bha 'glusë 'ö- -kë kwa 'ka bhë =nɛ 'ka bɔ -a -ta 'ö dhasü -yö -kë ka -gɔ. <sup>6</sup>Kwaa- Yesu Klito -nu kwa -bha -klu 'kuë- -sü 'gü, -Zlan =ya kwa bho ga 'gü -a 'gü =zian'. =Ya kwa -ya dhang- 'gü kö kwaa- Klito -nu 'kwaan- -gludëdhe kë. <sup>7</sup>-Yö 'wun -së -kë kwa -dhë =bɔa' Yesu Klito 'gü -sü 'ka, -yö kë 'dhö kö 'töng 'saadhö 'ö dho nu, kö 'glusë 'gblüünzë 'ö -ziö pë 'ple -ta 'yö- -kë kwa -dhë bhë -yaan -zɔn. <sup>8</sup>Bhii -Zlan -bha 'glusë bhë =nɛ, 'ka bɔ -a -ta, 'ka dhasü yö, ka -bha -zo yö -sü 'ka. Dhasü 'ö bhë -a -gen yaa 'go ka 'gü. -Yö -Zlan -bha gbɔɔ 'kpaan 'ö -kë -a 'ka. <sup>9</sup>Yaa -de -bha yuö 'ka- -kë -a =truën 'ka; =dhe 'ö 'pö kö =kun 'ö mɛ gbɛ -yö 'ö -de sü =va! <sup>10</sup>Bhii -Zlan =nɛ 'ö kwa -yuö -kë; -yö -kë -a 'gü -sü -dëü -nu kwa -dhë =bɔa' Yesu Klito -ta -sü 'ka -yö kë 'dhö kö yuö -së -nu 'ö =ya -an kë -piö -nu 'dho 'kuë- -an -ya kwa -gɔ -sü 'ka bhë 'kwaan- -an kë -së 'ka.

**-Kë do -sü 'ö Yesu Klito 'gü**

<sup>11</sup>=Dhe 'ö 'pö, mɛ -nu 'ö 'kaa Zuifö 'ka, ka 'ö Zuifö -nu -wo ka -dhe -druen, 'kɛɛ kö wo -zë -wo wo -de -dhe -kweazë -nu, =duakëpë 'ö mɛ 'bhee- -nu 'dho -a kë -na wo bun 'gü 'kpaan bhë -a -wun 'gü, ka -de 'pö ka -zo -yö -büö -ko 'ö 'ka =kaa' 'dhiö =zian' bhë -a 'ka. <sup>12</sup>'Töng 'ö 'dhö bhë -a 'ka, ka -kë Klito 'ka =gbiin, 'ö kaa kë -Zlan -bha 'segɔ 'ö- sü -a 'gü -mɛ -nu 'ka; ka -kë -Zlan -bha -dhi 'kuë 'ö- -kë 'ö -bha 'segɔgüme -nu 'ka 'ö pë 'tɔ 'go -sü 'ka -an -dhë bhë -a -gɔ plaan =zian'; ka ka -bha -kë -a 'gü -sü -kë 'kpongtaa =nɛ mɛ -nu 'ö -an -zo -yö -a -bha -pë gbɛ 'yaa 'dhö waa- mɛ -nu 'ö 'waa -Zlan dɔ -an 'dhö. <sup>13</sup>Kɛɛ zlöö =nɛ kaa- Yesu Klito -nu ka -bha -kpa 'kuë- -sü 'gü, ka 'ka -kë 'ma =gbiin -be bhë, 'ka =yɔɔn -Zlan 'ka =klöö' -bɔ Klito fei 'ö -lo -a -bha ga -sü 'ka bhë -a -ta -sü 'ka. <sup>14</sup>Bhii Klito -de gia- =nɛ 'ö nu =zuöyagluu 'ka kwa =dhia; yö =nɛ 'ö mɛ -nu 'wo Zuifö 'ka waa- mɛ -nu 'waa Zuifö 'ka -an -kë 'segɔ do 'gü -mɛ 'ka. 'Go mü 'zü, 'ö pë 'ö -kë =nɛ böü- 'kplong 'dhö

ö- -naa -da -an ziën 'ö 'wo -kë yaagüme 'ka wo 'ko -nu -dhë bhë 'ö- -lo.  
 15-Ya Zuifö -nu -bha tɔng -nu, ö 'gü -dhiodɔwo -nu waa- ö 'kun -kɔ -nu  
 'gü -siö'- 'fefedhö kö -yaan me =suu'- -ta =ple 'wo bhë -an kë 'segɔ do -dëü  
 'gü -me -nu 'ka -kë do -sü 'gü ö 'piö kö -yaan kë -zuöyagluu nu -sü 'ka.  
 16 Klito -bha -ga -gaatalü -bha -sü 'ka =ya 'ko -san zë -sü 'ple yën, -an -kpa  
 'kuë- -sü 'ka -Zlan 'piö =ne me -lü dosen 'dhö. =Ya dhidhe -da waa- -Zlan  
 -an ziën. 17-Kɔ 'ö bhë =ne 'ö Klito -yö nuë -zuögludhi -wuntaɔsë bhë -a 'ka  
 me -nu 'kaa Zuifö 'ka, 'ka kë -Zlan 'ka -gbiin waa- me -nu 'yi Zuifö 'ka 'yi-  
 'ka -klöö', -a 'ka kwa 'ple kwa =dhia. 18 Bhii Klito 'gü =ne 'ö kwa 'saadhö, ü  
 Zuifö 'ka oo, 'bhaa Zuifö 'ka oo, 'kwa dho -mɔa kö 'kwaan- 'dho -Zlan wö  
 'dhiö -Zuu 'slööslö do 'ö bhë -a -bha -nu kwa -dhë -sü 'ka.

19-Dhe -kë 'dhö, me -nu kaa kë Zuifö 'ka bhë, 'kaa -nia -nu 'iin me -nu  
 'wo go plaan -an 'ka gbɔ. 'Kee ka zlöö -Zlan -bha 'së 'gü 'në -nu, me -nu  
 'wo- -gɔ 'kɔɔme -nu 'ka -an 'ka 'pö. 20 Ka -de 'pö, 'kɔ 'ö dɔ 'ö Yesu -bha bɔme  
 -nu waa- -Zlan -wodhiölome -nu 'dhö -a 'zü -gban -a tapë 'ka bhë, ka -dɔ  
 -pë 'bhaa -nu 'ka; 'ö -an kuënnu -guö 'ö =ya kë 'wo- -da -na 'kɔ 'bhong 'piö  
 'ö 'kɔ 'dho dɔ -na genngdhö bhë 'yö -kë Yesu Klito gia- bhë -a 'ka. 21 Yö =ne  
 'ö tɔɔ 'kɔ 'ö bhë -a -gen 'gen- -gen; -yö kë 'dhö kö -yö 'dho dhuö -yaan kë  
 -Zlan -bha 'kɔ 'slööslö 'ka Dëme 'gü =zian'. 22 Ka -bha -kpa 'kuë- -sü 'ka -a  
 'gü, ka -de 'pö 'ka kë 'kɔ 'pian me -nu 'wo dho nu -waan kpa -a me 'wo to  
 -an -bha 'kaan- kë 'kɔ 'ö -Zlan 'dho -a 'gü ö -bha -Zuu 'slööslö 'ka -a 'ka.

### Me -nu 'waa Zuifö 'ka -an -bha yuö -wun -yö tën -sü 'ka Pölö -bha

**3** 1-Ka -dhe -ga! Ma Pölö ma -ga 'ö -kë Klito -we -a -bha -wun 'ka 'a -ya  
 -kanso 'gü yuö 'a- kë -na -a -dhë ka ziën bhë -a -wun 'gü =ne. 'Kee me  
 -nu 'ö 'kaa Zuifö 'ka, a -bhea -Zlan -dhë ka -wun 'gü. 2 'Ma -dhe -ga, yuö 'ö  
 -Zlan -bha 'glusë 'gü 'ö- kɔ n kwëe ka -bha 'ka bhë, 'ka- -wun ma. 3 Bhii  
 -Zlan -yö -we -a -bha 'yö n sü 'ö- -bha 'slë 'ö -kë -bin -sü 'ka bhë 'ö- -zɔn n  
 -dhë. (A 'wun 'ö -gban -a -bha -a 'bhaa -nu -ya dhuö zian. 4-Yö kë 'dhö, =ya  
 kë =ne ka- pö -na kö 'wunbhokoudɔdhe =suu'- 'ö- nu n -dhë pë -nu 'wo -kë  
 -bin -sü 'ka 'wo -gban Yesu Klito -bha -an 'gü bhë 'kaan- -a -tei' dɔ.) 5 Pë 'ö  
 -kë -bin -sü 'ka 'kpa bhë, yaa- -zɔn me -nu -dhë; 'kee =dëe =ne -a 'gü, -Zlan  
 =yaa- yö -dhegbeadhe 'gü, =yaa- -zɔn -bɔa' -Zuu 'slööslö -ta -sü 'ka Yesu  
 -bha bɔme -nu waa- ö -wodhiölome -nu 'ö 'wo -dëe -an -dhë. 6 Pë 'ö -kë -bin  
 -sü 'ka bhë 'ö =ne: 'Wuntaɔsë 'ö bhë me -nu 'waa Zuifö 'ka =wa bɔ -a -ta =wa  
 yö me -nu 'wo Zuifö 'ka -an -bha, =wa kpa wo 'kuë-; pë -sëebɔ -nu 'ö -Zlan  
 -ya -ya ö -bha 'segɔgüme -nu -bha 'ka =waa- yö. =Wa kë bun do 'gü -me 'ka;  
 'ö 'go mü =wa kë -ziö pë 'tɔ 'go -wo 'ö -Zlan -yö bɔa 'wuntaɔsë 'ö -gban Yesu  
 Klito -bha bhë -a 'gü bhë -a 'piö -me 'ka =waa- yö.

7 'Wuntaɔsë 'ö bhë 'ma kë -a -blëe'- -me 'ka, gbɔɔ do 'ö -Zlan -ya -kë  
 n -dhë ö -bha 'glusë 'gü bhë -a -wun 'gü. -Ya -kë n -dhë 'dhö ö -bha  
 'piigbeedhe =kwaa'. 8 A me 'gügaüzë -nu -bha me 'gügaüzë 'ka -Zlan -bha

'segogüme -nu 'slööslö ziën; 'kæ -Zlan -yö -we -a -bha n -gɔ kö 'wuntaəsë 'ö -gban pë -sæɛɔ -nu 'gblüünzë 'wo Klito 'gü bhë 'a- -bleɛ'- me -nu 'ö 'waa Zuifö 'ka -an -dhë. <sup>9</sup>'Go mü 'zü kö 'aan- kē kö me -nu 'töüdhö -waan -Zlan -bha 'slë 'ö -kë -bin -sü 'ka bhë -a kē -kɔ 'yö dho kaa kö -wa yö. -Zlan 'ö pë 'plë -da bhë -yö -kë 'slë 'ö bhë -a -bin =dhia 'dhö -be -kplawo, <sup>10</sup>-yö kē 'dhö kö zlöö -bha =ne bhë, -wogbiindhe -nu, 'piigbeedhe -nu 'wo kēdhe 'ö dhang- 'gü -a -bha -waan -Zlan -bha 'kpaakpadhe -wun dɔ -kɔ =suu'- 'saadhö -ta =bɔa' Yesu -wun -dhe 'wun gia- -me -nu -dho 'kuë- -sü wo -kɔ -ta -sü 'ka. <sup>11</sup>-Zlan -ya -kë 'dhö bhii pë 'ö- -yö 'ko 'dhiö -kë 'ö =zuö' 'piö =toëpö 'ka, 'ö- -de -kë =bɔa' kwa Dëme Yesu Klito -ta -sü 'ka yö -mü. <sup>12</sup>Kwa -bha -kë do -sü 'gü waa- kwa -bha -zo -yö -a -bha -sü bhë -yö -potaasü -nu kwa -dhë kö 'kwaan- 'dho -Zlan wö 'dhiö -zo yö -sü giagia 'ka. <sup>13</sup>-Dhe -kë 'dhö bhë a- -pö ka -dhë kö -kun 'ö -kë ka -dhë ya 'ö ka 'gü -yö ga 'klobhodhe -nu 'wo nu -na n -ta ka -wun 'gü bhë -a -wun 'gü; bhii yö =ne 'ka dho bɔ -a -ta 'kaan- 'wun -së yö.

#### Yesu Klito -bha me -dho

<sup>14</sup>Pë -nu 'ö kwa Dë -Zlan -ya -kë kwa -dhë 'töüdhö bhë, 'ma n -zo 'ta -a 'gü, a -lo n kpɔn 'gü -a wö 'dhiö =bheɛ' -sü 'ka; <sup>15</sup>yö =ne 'ö 'të -pë -nu -dho 'kuë- -sü 'saadhö 'wo dhang- -nu 'gü waa- -an me -nu 'wo 'kpongtaa 'ö -an -bha -kēdhösü -yö go -a kwæ. <sup>16</sup>A- -dhe -a -gɔ kö -a -bha 'glusé =va 'gü -yö ka -zo -gban -Zuu 'slööslö =kwaɛ'; <sup>17</sup>kö Klito -yaan -ya ka =zuö' 'gü ka -bha -zo -yö -a -bha -sü 'gü, kö ka -gen -yö -gban 'gbee- 'ka -dho 'ö -Zlan -ya kē kaa bhë -a 'gü. <sup>18</sup>Bhii -kɔ bhë =ne 'ö ka -bha -kpa -Zlan -bha 'segogüme -nu 'slööslö -bha -sü 'ka, 'ka dho -mɔa kö -kɔ 'ö Klito -bha -dho -ta 'dho -a 'ka 'gbea -zian' 'plë 'ka, 'ö- dhuö -zian 'dho =gbiin, 'ö- sia- -zian 'dho =gbiin bhë 'kaan- -a -gen dɔ; <sup>19</sup>'go mü kö -a -bha -a -dho -kë kwa 'ka -sü 'ö ziö me 'bhee- -bha 'wundodhe =suu'- 'saadhö -ta bhë kö 'kaan- -a 'zü yö -yaan dhoë 'dhö kö 'dhuë- 'saadhö 'ö go -Zlan 'piö bhë -yaan -a nu ka -dhë 'ö 'plë 'ka.

<sup>20</sup>-Zlan 'ö bhë -kɔ -mɔ 'wuën- -sü -ya -gɔ kö -yaan pë -nu kē -yaan zië =gbiin kwa -dhe -pë -nu 'iin kwa -zo -ta -a 'gü -wun -nu 'plë -ta 'piigbeedhe 'ö yöö kē -na kwa 'gü bhë -a =kwaɛ'; <sup>21</sup>kö -yö -Zlan 'tɔ bho, -yö kē -a -bha 'ka bɔa Yesu 'ö Mëdhamë 'ka bhë -a -ta -sü 'ka, -a -wun -dhe 'wun gia- -me -nu -dho 'kuë- -sü ziën 'töng 'saadhö 'ka, =toëpö 'ka! Amen.

#### -Kë do -sü 'ö bun 'gü

**4** <sup>1</sup>-Dhe 'ö 'pö, ma 'a -kansogüme 'ka, Dëme -bha yöö kē -sü -wun 'gü, a- -dhe ka -gɔ kö 'ka 'ta -sü =ne -kɔ 'ö- 'ka -Zlan -dhë -së 'ö ka -dhoɔ =kaa' bhë -a 'dhö. <sup>2</sup>-Ka kē -de -dho sia- -me -nu 'ka -kplawo =zuö' -kë -saa -sü 'ka, -kë 'lëälë -sü 'iin -dho me -nu -dhë -sü 'gü. 'Ka ka 'ko -nu 'sü -së -dho 'gü. <sup>3</sup>-Ka ka -de 'gbee- -ta bho kö -kë do -sü 'ö -Zuu 'slööslö -ya nu

ka -dhë bhë -yaan kè ka -gɔ, -zuöyagluu 'ö go -Zlan 'piö 'yö ka ziën bhë -a -kwaä'. 4A- -pö 'dhö 'ö tɔɔ -Zlan -bha me -nu -dho 'kuë- -sü 'ö Klito bun 'ka bhë, -yö 'dhö do 'ka, 'ö -Zuu 'slööslo 'dhö do. -Kɔ do gia- bhë 'ö pè 'ö -Zlan -yö ka -dhɔɔ =kaa' 'ö ka -zo 'dhö -a -dhë bhë 'ö- 'ka do 'pö. 5Kwa Dëme -yö do; kwa -zo yö -a -bha -me -yö do, 'ö -bɔ yiö -sü 'wo- wo Yesu 'tɔ 'ka bhë 'dhö do; 6-Zlan 'ö pè 'kpekpe Dè 'ka, 'ö yö -ne 'ö -gludëdhe -kè pè 'saadhö -ta, 'ö 'wun -nu -kè -bɔa' kwa 'saadhö kwa -ta -sü 'ka, 'ö kwa 'saadhö kwa 'gü bhë, -yö do.

7Me 'ö -dhö kwa ziën, gbaɔ 'ö dan -sü 'ka -a -tian', Klito -ya -nu -a -dhë. 8Bhii pè 'ö =been' -sü 'ka 'ö -gban -a -bha -ya -pö: =Dhe 'ö -da -na dhang- 'gü, kö =ya 'to -a 'gbee- 'ka, -yö 'gan 'gü -me -nu -sü 'ö 'piö. =Dhe 'ö -lo 'ma, -yö gbaɔ -nu -kè me 'bhee- -nu -dhë. 9«Ya -da» 'ö bhë -a -gen tɔɔ -mè poo =e? -A -gen tɔɔ -yö -yɔɔ sia- -bleezë 'ka. 10Me do 'ö =yɔɔ bhë, yö do bhë -ne 'ö -da dhang- 'gü, -yö kè 'dhö kö -yö -gludëdhe kè pè 'saadhö -ta. 11Yö -ne 'ö gbaɔ -nu dan 'ö- -kè me 'bhee- -nu -dhë; -ya -kè 'ö me do do -nu -wo -kè 'ö -bha bɔme -nu 'ka, 'ö me do do kpö 'waa gbe -wo -kè -Zlan -wodhiölome -nu 'ka; 'yö- -kè 'ö me 'bhaa -nu -wo -kè 'wuntaɔsë =blee' -me -nu 'ka; 'ö me 'bhaa -nu -wo -kè pasütëë waa- me =daan' -me -nu -an 'ka. 'ö 'go mü 'ö yuökëme -nu 'wo bhë 'töüdhö -an -kè gbaɔ 'ka Yesu -wun -dhe 'wun gia- -me -nu -dho 'kuë- -sü -dhë. 12-Ya -kè 'dhö kö yuö 'ö -Zlan -bha 'në -nu 'wo to -an -bha 'ka do do 'ka bhë, -waan -an =daan' -a kè -sü 'ka kö Klito bun 'ö bhë -yö -kpea' -zo yö -sü 'gü. 13Bhii -kɔ bhë -ne 'ö kwa -bha -zo -yö -Zlan -bha -sü waa- kwa -bha -a Gbö dɔ -sü dho kaa do, 'ö 'kwa -dho kè me -de -bɔ -nu 'ö -an -bha 'wun -dho 'dhiö -kɔ -yö bhɔ giagiawo Klito -bha -bha -an 'ka. 14-Yö kè 'dhö kö -kun 'ö 'kwa dho kè 'në 'sëen- -nu 'ö 'wo -we 'wun -suu' -'oo =suu' -bha bhë -an 'ka gbaɔ =ne 'yitagɔ 'ö 'tëë waa- 'yi kpö -nu 'wo dho -na -a 'ka -de 'iin -de zian bhë -a 'dhö. Bhii me 'ö- -bha 'wundɔdhe 'dho 'tee =ne 'në 'sëen- -nu -bha 'dhö, -yö -ziö me =daan' -wo =suu' -'oo =suu' -'piö 'ö -püö. 15Pè 'kwa dho -a kè =zian' 'ö tɔɔ 'wun gia- 'ö bhë kè 'kwa dho wo -a 'gü -dho 'gü kö 'kwaan- dhoë 'dhiö pè -nu 'wo bhë 'saadhö -an 'gü 'kwaan- yöë Klito 'ö kwa -gɔ =taa bhë -a -bha. 16Yö -ne 'ö- -kè 'ö bun bhë 'ö- dɔ -nu 'wo- -bha 'wo dɔ genngdhö -klu 'kuë- -sü 'ka; 'ö bun -dhe 'saadhö =wa kpa wo 'kuë- kpinngdhö, 'ö dɔ 'ö -dhö -a -bha =faan' 'ö- -gɔ 'ö nuë 'wo yö wo 'kuë- 'ö bun -yö -kpea -dho 'gü -zian'.

### -Kë -a 'gü -sü -dëü 'ö Klito 'gü

17=Dhe 'ö 'pö, pè 'a- =blee' -na kwa Dëme 'tɔ 'gü 'ö -ne: Kö -kun 'ka 'ta sü zlöö =ne me -nu 'ö 'waa -Zlan dɔ, 'ö 'wo 'ta 'sü -na wo -bha -zo -ta -a 'gü -wun 'ö 'kpaan 'ka bhë -a 'dhö, 18'ö 'wundɔdhe gbe 'yaa -an -gɔ bhë -a 'dhö. -Kë -a 'gü -sü 'ö -Zlan -ya nu bhë -an -bha gbe 'yaa- 'gü, bhii 'ö tɔɔ 'waa 'wun gbe dɔ, 'go mü 'ö -an =gɔü' =ya kè 'gbee- =gbaɔnsü. 19Lë- -bha me kè -sü gbe 'yaa -an =zuö' 'piö gbaɔ bhë, yö -ga 'wo wo -de nu -na -kè -dhuuzë -sü -dhë, 'ö 'wo 'dho -na -a 'ka 'dhiö -kplawo bhë.

20 'Wun 'ö -gban Klito -bha 'ö 'ka- ma yö kun bhë. 21 'Ma -dhe -ga, 'wun 'ö -gban -a -bha bhë =waa- =blæ'- ka -dhë, 'ö go mü, ka -bha -kë -Zlan -bha 'nä -nu 'ka -sü -wun 'gü, 'ö =wa ka =daan'- 'wun gia- 'ö -gban -a -bha bhë -a 'ka. 22 -Dhe 'ö 'pö, kö -ka ka bo ka -bha wö -kɔ zii 'ö ka kë -kɔ 'ö 'dhiö -zian' 'ö- yö -dhegbeadhë 'gü bhë -a bho ka -bha =ne -kɔ 'wo sɔ zii bho -na 'ka wo -bha 'wo- =zong' -na -a 'ka bhë -a 'dhö! Bhii wɔ -kɔ zii 'ö -kë -de -dhoɔbhaapë -nu 'wo -kë me -püö -pë -nu 'ka bhë =ne 'wo dho me -nu 'ka -dhoŋg -zian 'piö. 23 -Ka 'we -a -bha kö -Zlan -yö =zuö' -dëü -ya ka 'gü -zian' -Zuu 'slööslö =kwaä'. 24 Wɔ -kɔ -dëü 'ö -Zlan -ya -da 'ö bho -a wɔ -kɔ -bha bhë, -kaa kë ka -bha =ne sɔ -dëü 'dhö ka -bha. Yö =ne 'ö nu -kë -a 'gü -sü 'ö kpengdhö, 'ö 'slööslö, 'ö 'wun gia- 'gü bhë -a 'ka.

25 -Dhe -kë 'dhö, -ka ka =kwaä'- =sua -nu kë -sü -zü; me 'ö -dhö -yö 'wun gia- =blæ'- 'ö -ya 'yɔɔ -dhë. Bhii kwa 'plɛ =ne 'kwa 'dho kwa 'kuë'- 'kwa kë Klito bun do 'ö bhë -a 'gü -me 'ka bhë. 26 'Ö =ya kë =ne 'wun =ya na ka -züë ka 'ko -nu buëndhö, me 'ö 'dhö -yö 'ö -zo kë 'ö -de 'piö -yö kë 'dhö kö -kun 'ö dho pë yaa kë; kö -kun 'ö to -naazuëdhe 'ö bhë -a 'gü 'ö 'bin -yö maa. 27 Bhii -naazuëdhe 'ö bhë, 'ka- 'to ka 'gü kö 'ka -ya -dhe nu dü -dhë ka 'gü =ne bhë! 28 Me 'ö =kwaanme 'ka -yö 'ö =kwaä'- =kwaan -sü -zü; -yö yuö -nu kë 'ö -kɔ 'ka =zian' kö pë -nu -waan kë -a -gɔ -yaan me -nu 'wo 'yenazë -an -bha nu. 29 Kö -kun 'ö 'wun yaa gbe -yö 'go ka 'dhi 'ö yö plaan! -A -dhe =ya kë -a -bha, -ka 'wun -sëebɔ -nu 'wo dho me -nu 'wo to -an -zo -gban -zo yö -sü 'gü -an =blæ'- =zian'. 'Ö =ya kë =ne =wa 'wun -sëebɔ -nu =blæ'-, me -nu 'wo- ma -na bhë -yö pë -së -kë -an -gɔ. 30 Kö -kun 'ö ka kë -kɔ -nu 'gü 'ö -Zuu 'slööslö 'ö ka 'gü bhë 'ka- wö -siö! Bhii -Zuu 'slööslö -yö -Zlan -bha -duakëpë 'ö ka 'gü -a 'ka; -yö pë 'ö- dɔ kwa kwæ, pë 'ö- yi -ya -lo 'ö dho kwa bhoë 'gan 'gü 'ö 'plɛ 'ka -a 'ka. 31 -Ka -nu me =zuö' 'piö -wun 'güüzë, -dɔ me -gɔ -sü =suu'- 'saadhö -nu, -naazuëdhe =suu'- 'saadhö -nu -an kë, -wo 'go ka =zuö' 'gü! =Gblaa 'gbla me -nu -ta -sü, 'si -nu bho -sü waa- 'dhi -wo -ya me -nu -bha -sü -Zlan 'tɔ 'ka -sü -nu 'wo bhë, -ka 'kan -an -bha! -Ka ka -de 'kun =zuö' 'piö yaa =suu'- 'saadhö -gɔ! 32 Pë 'ö 'ka dho -a kë =zian' 'ö tɔɔ kë 'ka dho -a wo me -nu këwunsëëzë 'wo pa -sü 'ka me -nu 'yënnng yö -sü 'ka wo 'ko -nu ziën -an 'ka! -Ka ziö me -nu -bha 'wun =zaa' -sü -nu -ta 'ö 'plɛ 'ka =ne -kɔ 'ö -Zlan -yö -zië' ka -bha 'wun =zaa' -sü -nu -ta =bɔa' Klito -ta -sü 'ka bhë -a 'dhö.

### -Tosiadhë -kë -dhepuudhë 'gü -sü

**5** 1 -Dhe 'ö -kë =ne ka -Zlan -bha 'nä -nu 'ö -an -dho -kë -an 'ka, kö -kaa këdhë =mæ'- 'ka 'wun -nu kë =ne -kɔ 'ö 'wun -nu kë -na -a 'ka bhë -a 'dhö. 2 Kö ka -bha -tosiadhë kë -kɔ -yö 'go -Zlan -bha -dho 'gü. -Yö bho Klito 'ö- -dho -kë kwa 'ka 'ö 'ö =kwaä 'ö -de -wun -zü kwa -wun 'gü =ne slabhoëpë 'ö- -wun -yö -Zlan -zo kun -a 'dhö bhë -a -bha.

3 Ka -bha -kë -Zlan -bha 'sëgɔgüme 'ka -sü -wun 'gü, kö =kun 'ö pë =suu'- 'oo =suu'- 'ö =sɔɔn kë -sü 'ka -nu, -dhuupë 'saadhö waa- me gbe -bha pë

-dho -wun -yö -kë ka ziën. <sup>4</sup>Yaa -së 'pö 'gbönggböng kö 'ka 'dhi -va 'gü -wun 'iin 'dhi yaa 'gü -wun -blëe', kö 'ka 'wun 'ö 'flëë 'iin 'wun -dhuuzë -nu -an -blëe'. 'Dhi 'ö 'ka 'wun yaa -nu -blëe' -na -a 'ka bhë, -kaa 'sü 'ka -Zlan zuö pö -a 'ka -zian'. <sup>5</sup>-Yö kë ka 'yaan -ne -sɔɔnkëme waa- me -dhuuzë -an -bha pë 'bhaa yaa 'dho kë Klito waa- -Zlan -an -bha pë -sɛɛɔ -nu 'wo -ya -sü 'ka kwa -gɔ -an -bha -gludëdhe -pö 'gü bhë -a -bha. Pë do bhë 'ö- 'ka 'pö, me 'ö pë 'yaa- -zo kun, 'ö- 'bhaa -mɛɛ' -na -kplawo bhë -a -bha 'ka (bhii -to pë -mɛɛ' -sü 'piö -sü -kplawo 'ö bhë 'pö -yö pë gba -kɔ -suu'- do 'ka 'pö.)

<sup>6</sup>Kö -kun 'ö me gbe -yö ka -püö ö -blëe' -wun -nu 'ö -an -gen gbe 'yaa -dhö -an 'ka! Bhii 'wun -zaa' -sü 'ö- -suu'- 'dhö bhë -ne 'ö dho kë -Zlan -bha -naazuëdhe -gen 'ka me -nu 'waa 'we -a -bhlë -ya -wun -bha bhë -an buëndhö. <sup>7</sup>Kö -kun 'ö me -nu 'wo bhë 'ö ka -nu kaa- pë -yö -kë 'kuë-! <sup>8</sup>Bhii 'ö tɔɔ -dhe 'ö -tun 'dhiö -zian' -be, ka -kë -dhetiidhe 'gü, 'kɛɛ zlöö -ne bhë kaa- Dëme -nu ka -bha -kë do -sü 'gü, 'ka nu -dhepuudhe 'gü. -Dhe 'ö 'pö kö ka 'ta 'sü -kɔ -yö kë -ne me -nu 'wo -dhepuudhe -bha 'ka -an 'ta 'sü -kɔ 'dhö! <sup>9</sup>Bhii pë 'ö -dhepuudhe 'piö 'ö tɔɔ këwun -së -suu'- 'saadhö, -ta kpengdhö -sü waa- 'wun gia- -blëe' -sü. <sup>10</sup>-Ka ka -de 'gbee- -ta bho kö pë 'ö Dëme -dhë -së 'kaan- -a kë! <sup>11</sup>Kö -kun 'ö -dhetiidhe 'gü -me -nu këpë 'ö- -yö -a -bha -pë -së gbe 'yaa 'dhö bhë 'ö ka -nu kaa- pë -yö -kë 'kuë-! Pë -nu 'wo -kë -na bhë, -ka -an yö -zian' -dhegbeadhe 'gü! <sup>12</sup>('Wun -nu 'wo- kë -na -bin -blü 'gü bhë, -a -blëe' -sü -de -yö lëzë.) <sup>13</sup>Bhii 'wun -nu 'wo 'dhö bhë -wa yö -dhepuudhe 'gü, 'ö -an -bha -tosiadhe giagia -yö -luu 'puu -së 'ka. -A -wun 'gü -ne pë 'ö -luu' -sü 'ka 'puu -së 'ka, 'yö -kë -dhepuudhe 'gü. <sup>14</sup>Bhii me do -ya -pö: *Bhi 'ü yi zë -na -ne, -bhö -büö; -bhö -luu'- 'ü 'go me -nu 'wo game -nu 'ka -Zlan wö 'dhiö bhë -an ziën, kö Klito -yaan -dhe 'po ü -dhë!*

<sup>15</sup>-Dhe 'ö 'pö, -ka ka -zo kë ka -de 'piö ka 'ta -sü -kɔ -wun 'gü. Kö -kun ka 'ta 'sü -kɔ -yö -kë -ne me -nu 'ö 'waa 'wun dɔ -an 'ta -sü -kɔ 'dhö. 'Kɛɛ -kaa kë -zian' -ne me 'kpaakpa -nu -bha 'dhö. <sup>16</sup>'Wun -nu 'wo -wo -na ka wö 'dhiö bhë, -kaa kë -së, bhii yi -nu 'ö 'kwa -an 'gü -ne -wo ya. <sup>17</sup>-A -wun 'gü, kö -kun 'ka -kë me -nu 'ö 'waa 'wun -gen -nu dɔ -an 'ka; 'kɛɛ 'wun 'ö Dëme 'dho -a 'piö kö 'ka- kë bhë, 'ka -an -gen dɔ 'kaan- -an kë.

<sup>18</sup>Kö -kun 'ka ka -de nu yɔ 'yi -dhë! -Yö -dho -a kë 'ö 'ka -da -tosiadhe yaa kë -sü 'gü; 'kɛɛ -ka ka -de nu -Zuu 'slööslö -dhë! <sup>19</sup>-Ka -Zlan 'tɔ bho -tan -nu bho ka 'ko -bhaa; -yö -dho ka -faan' më. -Ka 'Tan 'sëëdhe -tan -nu waa- 'tan -dëü -nu 'ö -Zuu 'slööslö -ya -ya ka -zuö 'piö -an bho 'pö! -Ka 'tan -nu 'wo bhë -an bho, 'ka kwa Dëme zuö pö ka -zuöga 'plɛ 'ka! <sup>20</sup>-Ka Dë -Zlan zuö pö 'töng 'saadhö 'ka 'wun 'saadhö 'ö nu -na ka -ta -a -wun 'gü kwa Dëme Yesu Klito 'tɔ 'gü!

### Dhoo -nu waa- wo -gɔn -nu

<sup>21</sup>-Ka ka -gɔ 'dho ka 'ko -nu -dhë sia- -bhlëyadhe 'ö Klito -bha 'ka ka 'gü bhë -a -wun 'gü.



<sup>22</sup>Dhoo -nu, -ka ka -gɔ 'dho sia- ka =gɔn -nu -dhë -ne -kɔ 'ka- =kaa' Dëme 'dhiö -a 'dhö. <sup>23</sup>Bhii gɔɔn- =ne 'ö ö bɔɔ =kɔɔn =ne -kɔ 'ö Klito 'dhö -a 'ka ö -wun -dhe 'wun gia- =me -nu -dho 'kuë- -sü =kɔɔnme 'ka bhë -a 'dhö. Klito gia- =ne 'ö tɔɔ Yesu -wun -dhe 'wun gia- =me -nu -dho 'kuë- -sü Dhame; yö =ne 'ö tɔɔ -a bun. <sup>24</sup>Ya kë 'dhö, dhoo -nu dho wo -gɔ dho wo -gɔn -nu -dhë sia- pë 'saadhö 'gü =ne -kɔ 'ö Klito -wun -dhe 'wun gia- =me -nu -dho 'kuë- -sü -yö ö -gɔ dhoë sia- -a -dhë bhë -a 'dhö.

<sup>25</sup>Dhemedë -nu, me 'ö -dhö, -yö ö bɔɔ -dho kë =ne -kɔ 'ö Klito -yö ö -wun -dhe 'wun gia- =me -nu -dho 'kuë- -sü -dho =kaa' 'ö ö -de nu -a -wun 'gü bhë -a 'dhö! <sup>26</sup>Ya -kë 'dhö kö -kë -Zlan -bha 'ka -sü bhë -yaan -an -ma 'kun -an kë 'ö- wo 'slööslö -bɔ yiö -sü waa- -an =daan'- 'ö- wo -Zlan -wo 'ka bhë -a -wun 'gü. <sup>27</sup>Yö kë 'dhö kö -yö ö -wun -dhe 'wun gia- =me -nu -dho 'kuë- -sü bhë -a -zɔn ö -de wö 'dhiö ö -bha -kë -së -sü, 'ö pë pin gbë 'yaa- -bha, 'ö 'yaa =yuuyu 'kou -sü 'ka, 'ö =zaadhe gbë 'yaa- -bha, 'ö 'slööslö =zian' -a 'gü. <sup>28</sup>Dhegɔn -nu =dua' -mü kö -waan wo bɔɔ -nu -dho kë =ne -kɔ 'wo wo -de bun -dho =kaa' -a 'dhö. Me 'ö =ya ö bɔɔ -dho kë kö =ya ö -de -dho kë. <sup>29</sup>A- =daa' =ne me gbë 'yaa ö -de bun -san zë; pë 'ö- -kë 'ö tɔɔ -a 'dhi gba 'ö- wo, 'ö ö -zo -kë -a 'piö =ne -kɔ 'ö Klito -ya =kaa' ö -wun -dhe 'wun gia- =me -nu -dho 'kuë- -sü -gɔ bhë -a 'dhö. <sup>30</sup>Bhii 'ö tɔɔ -a bun dɔ -nu 'ö 'kwa- 'ka bhë kwa do -a 'gü. <sup>31</sup>Pë 'ö =been' -sü 'ka 'ö =ne: -A -wun 'gü gɔɔn- -dho kan ö dë waa- ö dhe -an -bha, 'ö waa- ö bɔɔ 'wo -to wo 'ko =bhaa; 'ö -dhe 'wo- -bha =ple 'wo -kë zlöö =ne me -lü dosen 'dhö. <sup>32</sup>-Yö pë 'ö- 'gü -wun 'dho =va -a 'ka. N -zo 'piö pë 'a- yö -a 'gü 'ö tɔɔ -ya -zɔn Klito waa- ö -wun -dhe 'wun gia- =me -nu -dho 'kuë- -sü -an 'ka. <sup>33</sup>'Kee -yö 'wun =zuan' 'ö -zɔn -sü 'ka ka -dhë -a 'ka. Pë dho kë 'ö tɔɔ dhegɔn -yö ö bɔɔ -dho kë =ne ö -de 'dhö; 'go mü dhebɔ -de 'pö 'ö -dhö, -yö ö =gɔn =bhlë -ya.

#### 'Në -nu waa- wo -me -nu

**6** <sup>1</sup>'Në -nu, -yö ka =dua' 'ka Dëme wö 'dhiö kö 'ka ka 'kpɔme -nu -bhlë -ya, bhii -a -kë 'dhö -sü -yö kpengdhö. <sup>2</sup>Bhii tɔng 'ö -kë -bhö ü dë waa- ü dhe -an -bhlë -ya 'ka bhë =ne 'ö- 'piö -pë 'ö pë 'tɔ 'go -wo do 'ka 'ö- pö: <sup>3</sup>-Yö kë 'dhö kö =zuögludhi -yö kë ü -gɔ, 'go mü kö 'ü -tosiadhe kë -glɔɔsü 'kpongtaa.

<sup>4</sup>'Në dë -nu, ka -de 'pö, kö =kun 'ka ka -bha 'në -nu kun ya 'ö 'wo dɔ ka -gɔ 'yënnng. 'Kee -ka -an -to -an -daan' -sü 'ka 'wundɔdhe 'ö Dëme 'gü =zian' -a 'ka!

#### =Nua -nu waa- wo -gɔme -nu

<sup>5</sup>=Nua -nu, -ka ka -gɔme -nu =bhlë -ya -suö -an -dhë -sü 'ka ka =zuö' -së 'ka =ne -kɔ 'ka dhoë kaa Klito -dhë -a 'dhö. <sup>6</sup>Kö =kun 'ka -an 'yan 'dhiö -yuö -kë kö -yaan -zɔn -an -dhë =ne ka këwun =yö -së; 'kee -ka 'wun -nu 'ö -Zlan -zo 'kun -wun 'ka =zian' -an kë ka =zuöga 'ple 'ka =ne Klito -bha 'gan -nu

yuö kē -kɔ 'dhö. <sup>7</sup>Ka ka -bha 'gandhe -yuö kē ka =zuöga -sē 'ka =ne -kɔ 'wo yuö -kē -a -bha 'kpa Dēme -dhē -a 'dhö; bhii kaa- kē me -nu -de 'sloo -dhē! <sup>8</sup>Ka -zo -yö -büö =ne, me 'ü 'gan 'ka oo, 'iin 'ö -potaasü 'dhö ü -gɔ oo, pē 'ö Dēme -ya -ya ü =tian', ü -dho -a yö, ü këyuö -seebɔ -nu 'ü 'dhoë- -an kē bhē -a -wun 'gü.

<sup>9</sup>-Gɔme -nu, ka -de 'pö, ka 'ta 'sü -kɔ -yö kē -sē kaa- =nua -nu 'ka; -kaa kē 'slē 'ka kö -kun 'ka -wo yaa pö -an -dhē; -yö kē ka 'yaan =ne -an -gɔme waa- ka -gɔme -yö do dhang- -nu 'gü; 'ö -ziö 'ko -ta dhe gbe 'yaa -dhö -a wö 'dhiö.

#### -Zlan -bha 'nē -bha 'ko =zaa' -kwæ- -nu

<sup>10</sup>'Wun -kaanta 'a dho -a =blæ' ka -dhē 'ö tɔ kaa- Dēme -nu, ka -bha -kē do -sü 'gü, -ka =faan' 'sü -a -bha 'piigbeedhe =va bhē -a 'gü! <sup>11</sup>-Ka -piö 'saadhö 'ö -Zlan 'dhoë- nu -na ka -dhē bhē -an 'sü, -yö kē 'dhö kö 'ka dɔ gɛnnghö dü -bha -gleng -nu -gɔ! <sup>12</sup>Bhii 'ko 'kwa 'dhoë- zē bhē, kwa 'ka 'dho -a zē me 'bhee- -nu 'ka; 'kæ -yö -dho zē =zian' -zuu yaa -nu -bha 'piigbeedhe -nu 'wo 'dhung- -ta, -wogbiindhe -nu, -kɔ -mɔ 'wuën- -sü waa- wo -gɔme -nu 'wo -dhetiidhe 'gü 'kpongtaa -an 'ka. <sup>13</sup>-Dhe 'ö 'dhö -ka ka -kɔ kē -Zlan -bha 'ko =zaa' -piö -nu -bha! -Yö kē 'dhö kö 'kaan- dɔ ka yaagüme -gɔ 'yēng yi 'gbee- 'ka; bhii ka -dho dɔ gɛnnghö 'to 'ka 'dhoë- wo -a 'gbee- 'ka -a -ta bhē -a -wun 'gü.

<sup>14</sup>-Dhe 'ö 'dhö -ka -ya ka 'yaan; -ka ka 'dhu: 'Wun gia- -yö kē ka 'gü =ne -du kwi 'dhö, 'ka- -klu ka veedhö, -kē kpengdhö -sü -yö kē ka -gɔ =ne -glu gɔn -piö -da -sɔ 'nē 'dhö! <sup>15</sup>Ka -bha -kē =naazē -sü, =zuöwaannu -wuntaɔsē 'ö bhē -a -blæ'- me -nu -dhē -sü 'gü -yö kē =ne -sakpa -nu 'dhö ka -gɛn -nu -bha! <sup>16</sup>-Zo yö -sü -yö kē ka -gɔ -kplawo =ne -gluë 'dhaa- 'ö dho ka dha këpëyaame -bha 'dü -nu 'ö 'siö 'dho -a -bha -a -gɔ -a 'ka. <sup>17</sup>-Ka dhasü -wun 'kun 'gbee- 'ka =ne -gluë -piö =gblaa' 'dhö ka tuö; 'ka ka -kɔ kē -Zlan -wo 'ö -Zuu 'slööslö 'dho -a dɔ -na ka 'dhi bhē -a -bha =ne -dhaa 'dhö. <sup>18</sup>'Wun -nu 'wo 'dhö bhē -ka -an kē =bhea' -sü 'gü -a -dhe -Zlan -gɔ -sü 'ka kö -yö nu ka -dhē; -Zuu 'slööslö -yö 'dhiö 'sü ka 'ka, 'ka -bhea' -töng 'saadhö 'ö =gbëü ka -ta -an 'gü! -A -kē 'dhö -sü 'ka, -ka kē 'yēngsiöme -nu 'wo -to wo -wo 'gü -me 'ka -an 'ka! -Ka -bhea' -Zlan -bha 'segögüme -nu 'slööslö 'saadhö -wun 'gü! <sup>19</sup>-Ka =bhea' -n -wun 'gü 'pö, -yö kē 'dhö kö =ya kē =ne a 'dhoë- 'wun =blæ'- kö -Zlan -yö 'wun kpengdhö dɔ n 'dhi, 'iin kö 'aan- 'wun 'ö -bin -sü 'ka 'wuntaɔsē 'gü bhē -a yö sia- -an -dhē -zogbandhe 'ka kö -waan dɔ 'wun giagia 'ka. <sup>20</sup>'Wuntaɔsē 'ö bhē, a -bɔme 'ka, 'kö -kē =ne a -kē -kansö 'gü 'dhee; -ka =bhea' -n -wun 'gü kö 'a 'wun -nu =blæ'- -zogbandhe 'ka =ne -kɔ 'a dho -a kaa bhē -a 'dhö.

#### =Wekadhe -kaanta

<sup>21</sup>'Wun -nu 'wo -gban n -ma bhē kwa dheglu -dho kē -sü -zē Tisikö 'ö -to -wo 'gü -me 'ka Dēme -bha yuö -nu 'gü bhē, =ya nu 'ma, -yö -dho -a 'plē

-bleε'- ka -dhë. <sup>22</sup>A- -bɔ ka -dhë kö 'wun -nu 'wo yi -bha -tosiadhe 'gü 'nö kö 'kaan- -an dɔ, kö -yaan ka -faan' 'mä.

<sup>23</sup>Kö kwa Dë -Zlan waa- kwa Dëmε Yesu Klito -wo =zuöyagluu, -dhɔ waa- -zo yö -sü nu dhegluzë -nu 'saadhö -an -dhë. <sup>24</sup>'Go mü -Zlan -bha 'glusë -yö kë mε -nu 'saadhö 'wo- -dhɔ -kë Dëmε Yesu Klito 'ka -dhɔ ö 'yaa yën -a 'gü -an -dhë!